

02/06/2003

Usaha Paris dianggap buka jalan kerjasama

Azizi Othman

LAUSANNE (Switzerland): Malaysia menyifatkan usaha Perancis menjemput negara membangun menyertai Dialog Tidak Rasmi menjelang Sidang Kemuncak Negara G-8, sebagai membuka jalan pembentukan kerjasama lebih erat di antara negara maju dengan membangun.

Pada masa sama, usaha itu juga membuktikan sensitiviti Perancis sebagai tuan rumah Sidang Kemuncak G-8 kali ini terhadap perlunya suara negara membangun diambil kira dalam sebarang keputusan yang mungkin diambil oleh negara maju.

Menteri Luar, Datuk Seri Syed Hamid Albar, berkata sejak tercetusnya peristiwa serangan 11 September dan pencerobohan terhadap Iraq, ruang untuk negara membangun berdialog dengan kelompok negara maju semakin tertutup.

"Usaha Perancis mempelawa beberapa pemimpin negara membangun menyertai dialog itu dilihat sebagai langkah awal memupuk persefahaman di antara negara maju dengan membangun.

"Oleh itu, dialog ini ialah satu kesempatan untuk negara membangun mengetengahkan pandangan dan membincangkan mengenai kepentingan mereka," katanya kepada pemberita di sini, semalam.

Perdana Menteri, Datuk Seri Dr Mahathir Mohamad, akan mewakili Malaysia dalam dialog bersama semua pemimpin negara G-8 itu yang diadakan di Evian, Perancis kira-kira setengah jam perjalanan menaiki bot dari sini, hari ini.

Turut dijemput menyertai dialog itu ialah 13 pemimpin negara membangun lain termasuk Presiden China, Hu Jintao; Perdana Menteri India, Atal Bihari Vajpayee dan Presiden Afrika Selatan, Thabo Mbeki.

Dr Mahathir yang tiba di sini semalam, juga sempat mengadakan perbincangan dengan Mbeki serta dijadual bertemu Presiden Perancis, Jacques Chirac dan Presiden Russia, Vladimir Putin hari ini.